

四庫全書

史部

欽定四庫全書

禮部志稿卷八十六

明 俞汝楫 編

國卹備考

皇帝喪禮

洪熙年行

永樂二十二年八月文皇帝崩太子以下至諸王公主
斬哀三年如洪武儀在京文武官聞喪之明日詣思善

門外哭次於本署不飲酒食肉四日具斬衰服詣思善
門外朝夕哭臨三日又朝臨十日各十五舉聲哀服二
十七日凡入朝及視事白布裹紗帽垂帶素服腰經麻
鞋退服衰服二十七日之外素服烏紗帽黑角帶二十
七月而除聽選官人才監生吏典僧道諸人素服赴順
天府朝夕哭臨三日十五舉聲素服二十七日而除凡
音樂祭祀輟百日男女婚嫁官輟百日軍民素服二十
七日在外以聞喪日為始四日成服朝夕哭臨三日又

朝臨十日各十五舉聲服哀服二十七日後素服烏紗
帽黑角帶二十七月而除命婦素服舉哀三日二十七
月而除軍民男女素服一十三日在京官各給麻一四
夷使臣工部製服二十七日後皇帝素冠麻衣麻經臨
朝退仍哀服上謚前三日齋戒遣官祭告天地宗廟社
稷如儀是日內侍官置冊寶與于奉天門厥明捧冊寶
置與中皇帝具哀服詣奉天門內侍官舉冊寶與導引
官導皇帝後隨降階陞輅百官序立金水橋南北向侍

冊寶輿將至皆跪冊寶輿過輿隨皇帝後至思善門外序立北向皇帝降輅冊寶輿入至几筵殿丹陛上皇帝左門入就丹陛上拜位捧冊寶官至几筵前分左右立北向導引官奏四拜皇太孫親王皇孫陪拜丹陛上百官陪拜思善門外四拜皇帝由殿左門入詣大行帝几筵皇太孫以下皆跪奏進冊捧冊官跪進冊皇帝受以獻捧冊官以置于案奏進寶捧寶官跪進寶皇帝受以獻授如冊奏宣冊奏宣寶俯伏輿外傳贊亦如之行祭

禮皇帝詣几筵前就拜位四拜跪獻酒亞獻終獻俯伏
興四拜傳贊同導引官導皇帝由左門入詣神前捧冊
寶授內侍官捧入皇帝入內奉安頓首皇帝由左門出
丹陛上禮畢皇帝還宮

十二月禮部會議葬祭儀發引前三日奏告百官出宿
三日遣官以葬期告天地宗廟社稷皇帝哀服告几筵
皇太子親王以下皆哀服百官哀服朝一臨至發引止
前一日遣官祭經過應祀神祠皆設辭奠皇帝后妃皇

太子親王以下哀服致祭司禮監禮部錦衣衛官提督執事者設大昇舉陳葬儀于午門外并大明門外至日設啓奠皇帝哀服暨皇太子親王各四拜奠帛獻酒讀祝四拜舉哀興哀止望瘞執事者升徹帷幙拂拭梓宮內執事進龍輅于几筵殿下設真亭神帛輿謚冊寶于丹陛上設祖奠皇帝詣梓宮前西向立皇太子親王皆南侍立內侍奏靈駕進發捧謚冊寶神帛置輿內次銘旌出執事官陞梓宮內執事持翼左右蔽梓宮降殿內

侍官請梓宮陞龍輜執事官奏登龍輜以綵帷飾梓宮
執紼列左右繖扇侍衛如儀舊御儀仗前謚冊神帛真
亭銘旌以次行皇帝后妃皇太子親王及宮眷隨至午
門內后妃宮眷哭于帷中設遣奠如祖奠儀內侍請靈
駕進發皇帝以下皆哭盡哀皇帝還宮后妃以下俱還
梓宮由中門出至午門外禮官請梓宮陞大昇輿執事
官奉升大昇輿禮官請靈駕進發皇太子親王以下哭
送出端門外行辭祖禮執事官設褥位于太廟香案前

皇太子易常服奉神帛至太廟褥位跪置神帛于褥與
皇太子正立于神帛後皇太子跪禮官跪于左奏太宗
體天弘道高明廣運聖武神功純仁至孝文皇帝謁辭
贊五拜皇太子捧神帛興以授禮官禮官安輿中請靈
駕進發皇太子仍喪服并親王以下隨行梓宮由承天
門大明門中門出皇太子以下由左門出步送至德勝
門外乘馬至陵在途朝夕哭臨至陵執事官先陳龍輜
于獻殿門外俟大昇輿至禮官請靈駕降輿升龍輜詣

獻殿執事官奉梓宮升龍輜由中門入皇太子親王奉
謚冊寶與前行安神禮四拜興奠酒讀祝興四拜舉哀
止親王以下陪拜如常儀遣官祀后土並天壽山俟掩
玄宮設遷奠如常儀將掩玄宮皇太子以下詣梓宮前
跪請靈駕赴玄宮俯伏興執事官升奉遷梓宮入皇堂
內侍奉謚冊寶置於前陳寘器行贈禮皇太子四拜興
奠酒進贈執事官進玉帛捧于右皇太子獻以授內執
事捧入皇堂安置俯伏興四拜舉哀興哀止遂掩玄宮

行享禮如遷奠儀遣官祀后土及祭天壽山內侍設香案玄宮門外設題主案于前西向設皇太子拜位于前北向內侍盥手出主于案上題主官盥手西向題主畢內侍奉主置于神座藏帛廂中內侍讀太宗體天弘道高明廣運聖武神功純仁至孝文皇帝神靈上神主贊四拜興獻酒讀祝俯伏興四拜舉哀興哀止內侍啓櫝受主訖請神主降座升興至獻殿請神主降興陞座行初獻禮皇太子四拜興初獻奠帛酒讀祝畢俯伏興亞

獻獻終獻贊四拜舉哀興哀止望瘞內官捧神帛箱瘞
于殿前焚凶器於野葬日初虞柔日再虞剛日三虞後
間日一虞至九虞止在途皇太子行禮還京皇帝行禮
神主將還內侍請神主降座升輿儀仗侍衛如儀皇太
子隨仍朝夕奠神主還京先于城外置幄次錦衣衛備
儀仗教坊司備鼓吹不作百官哀服奉候城外神主至
入幄次百官序列于前五拜三叩頭神主行百官從至
午門外皇帝哀服迎于午門內神主至舉哀步導神主

升几筵殿內皇帝立殿上稍東西向內侍請神主降輿
陞座行安神禮皇帝四拜興奠酒讀祝興四拜舉哀興
哀止皇太子親王以下陪拜百官于思善門外行禮如
儀明日行奉慰禮卒哭用虞祭後剛日禮如虞祭于是
罷朝夕奠至卒哭之明日太常寺陳設禮饌於太廟如
時享之儀內侍設皇帝拜位于几筵殿上進御輦于殿
前丹陛上皇帝哀服四拜舉哀哀止立于拜位之東西
向內侍請神主降座陞輦詣太廟祔享至思善門外皇

帝易祭服升輅隨至午門外皇帝詣御輦前跪太常卿
跪奏請神主降輦詣太廟祔享皇帝俯伏興捧神主由
左門入至丹陛上典儀贊太宗體天弘道高明廣運聖
武神功純仁至孝文皇帝謁廟至一廟前內侍捧神主
置褥位皇帝於後八拜禮二廟三廟四廟五廟俱如儀
內侍捧神主朝於北太常卿立壇東西向贊賜座皇帝
搢圭捧神主安于座詣拜位行祭禮如時享之儀太常
卿請神主還几筵皇帝捧神主由廟左門出門外奉安

于車輦皇帝升輅陞至午門外皇帝至思善門降輅釋祭服易衰服內侍請神主降輦陞座皇帝行安神禮如前儀皇帝釋服還宮明日百官素服烏紗帽黑角帶行奉慰禮

宣德年行

洪熙元年六月上至自南京先是仁宗皇帝上賓遺詔上早正大位宮中以上至良鄉宮中始出遺詔文武百官常服于午門外立班四拜聽宣讀舉哀四拜太監楊

瑛戶部尚書夏原吉禮部尚書呂震捧遺詔往蘆溝橋
迎上上至橋遺詔慟哭左右扶詣幕次聽宣遺詔哭盡
哀易素服行文武百官素服迎于都城外上至長安右
門下馬步行哭至宮外釋冠服被髮詣梓宮前叩首哭
盡哀宮中自皇后以下皆哭盡哀上就喪次見母后親
王以次見上畢各就喪次自六月初三日開喪為始二
十七日而除自七月初一日為始鳴鐘鼓上服淺淡色
衣烏紗翼善冠黑角帶于奉天門視事百官皆淺淡色

衣烏紗帽帶朝叅如常儀退朝仍終太宗文皇帝服制
上曰朕心何能忍雖加一日愈于已初一日仍素服坐
西角門不鳴鐘鼓百日後再議八月行在禮部尚書呂
震言仁宗皇帝喪服已百日請上易素服御奉天門視
朝上諭震曰皇考劬勞大德奄至遐棄梓宮在殯旦夕
瞻奉几筵中心何忍所奏候山林事畢再議九月少師
吏部尚書蹇義等議言皇上孝思無窮禮貴得宜今祔
廟後仍素服于西角門視事至孟冬歲暮行時享禮太

常奏祭祀是日鳴鐘鼓上服黃袍御奉天門視朝上可
其奏宣德以後俱如儀仁宗既祔廟遇祭祀上黃袍祭
畢如初禪祭後始釋素服

成化年行

天順八年春正月英宗皇帝大漸召皇太子及太監牛
玉傳恭裴當黃順周善至榻前諭之曰自古人生必有
死朕病已深倘不諱東宮速擇吉即皇帝位遇百日成
婚皇后錢氏名位素定當盡孝養以終天年德王等宜

俱與善地俾之國殉葬非古禮仁者所不忍衆妃勿殉
葬殮時用袍服繫腰絛環帶皮鞋著易以鞋衣服多亦
無用擇吉地建陵寢皇后他日宜合葬惠妃亦須遷來
以後諸妃次第祔葬言俱遵行無違梓宮之陵遣親王
護喪行禮

皇太后喪禮

高皇后崩于洪武十五年仁孝皇后崩于永樂五年皆
以后禮故皇太后喪禮始於正統七年蓋仁宗張皇后

也
儀已見職掌

成化年行禮

成化四年六月甲寅慈懿皇太后崩丙辰禮部言孟秋
享太廟大行慈懿皇太后喪禮哭臨未畢移至初七日
上命仍于初一日祭詔禮部會文武羣臣議陵寢大學
士彭時等言大行慈懿皇太后作配英宗皇帝正位中
宮及皇上嗣居宸極尊為慈懿皇太后蓋先帝全夫婦
大倫皇上全母子深恩位號彰著已數十年壽終之後

宜奉梓宮祔裕陵奉神主祔太廟今欲別卜葬必以今
皇太后千秋萬歲之後二后並配非本朝之制然有二
太后方自今始則陵廟之制亦當自今日考古協義以
行之前代一帝二后並祔陵廟者未易悉數如漢文帝
尊其所生母薄太后然嫡母呂太后得罪宗社尚與父
高帝並葬長陵無易又如宋仁宗追生母李宸妃為太
后然嫡母章獻劉太后本無子尚與父真宗同祭太廟
無嫌皇上子慈懿皇太后若稍未合禮則致貽後議有

揜前美況千秋萬年之後今皇太后與慈懿皇太后同在陵廟不相妨碍愈足以見二太后生存之日雍和無間永久之後並美無窮載諸史冊增我皇明之光彰我皇上之孝此臣等所深願也上命禮部會羣臣定議以聞秋七月禮部尚書姚夔及在廷文武大臣翰林院科道等官九十九員集議陵廟禮制奏曰大行慈懿皇太后作配先帝二十餘年誠孝一心夷險一德孚于中外先帝眷禮始終無間兩宮名號既同二母體位相等

陛下孝養如一天下之人皆知陛下克體先帝初心以
為至仁大孝莫過於此今慈懿皇太后之喪與皇太后
千秋萬歲後俱合葬裕陵慈懿左皇太后右配享英廟
禮亦宜然少有疑阻不合典禮關係非小天下萬世將
有言之安保將來無據禮改正者乎上批答曰卿等所
言固正但聖母在上事有窒礙朕屢請未蒙俞允朕平
昔孝奉兩宮如一若因此違忤致有他虞豈得為孝今
當於裕陵左右擇吉地安葬崇奉如禮庶幾兩全卿等

其體朕意 翌日少詹事柯潛暨祭酒邢讓等三十二員上言合葬祔廟之禮有闕則先帝在天之靈不安天下後世謂皇太后與陛下為何如歷觀前代未有為皇后又為皇太后始終無他故而不得合葬祔廟者也逢迎者或以宣廟胡后為言此與今日萬萬不侔胡皇后乃宣宗在御之日讓位於章皇后今則先帝臨御未聞慈懿退讓也且先帝與胡皇后亦復正尊號增修陵寢一依后禮矣或又以慈懿無出禮有之妻與繼室雖無

出合祔其夫崇正體也縱使皇太后意有不懌陛下當
念先帝遵典禮為重而于母后從義不從命可也矧皇
太后聰明睿智洞識倫理陛下堅以為請理無不從此
蓋人倫之本風化之原早降綸音以慰先帝之靈以全
母后之德以順天下臣民之心陛下至仁大孝真足以
為法垂訓 明日魏國公徐輔暨公侯駙馬伯都督錦
衣衛等官三十五人復上言廷有諍臣實為美事后能
從諫允合天經伏望陛下起敬起孝和氣婉容上回聖

母之心下慰

闕

復上言曰父母有過人子哭諫人君有過人臣死諫孔子有曰生事之以禮死葬之以禮祭之以禮今欲置梓宮于他所必將奉神主于別室天地未安人事不順以是為禮臣所未喻若以為出于聖母當起敬孝悅則復諫不可遽已河南等道監察御史康永韶等四十一人復以為言禮部尚書姚夔合六部都察院通政司大理寺等衙門尚書李東等四十四人復上言曰天

下者祖宗之天下皇上有祖宗之天下當謹守祖宗之成法我國家立法垂憲一本于綱常尤嚴于君臣父子夫婦之間若母后之意果不見從當斷以大義亦在陛下處之而已時文武既上奏復跪伏文華門前以待必從而後已上悉覽奏復懇請於皇太后自己至申稍見從遂出數奏同辭批荅云卿等所言皆合朕意合葬之禮蒙允行矣於是文武羣臣皆呼萬歲而退丙子上尊謚曰孝莊獻穆弘惠顯仁恭天欽聖睿皇后頒詔如儀

九月庚申祔葬睿皇后于裕陵

弘治年行禮

成化三十三年十二月憲宗皇帝葬茂陵時孝宗皇帝
以生母孝穆慈惠皇太后紀氏祔葬其儀文武百官宿
公署致齋三日遣官以祔葬告天地宗廟社稷上親告
憲宗純皇帝几筵啓玄宮祭告陵園設奉遷官拜位于
享殿前內侍引奉遷官四拜奠帛獻酒讀祝四拜焚帛
祝畢別遣官祭告后土既啓玄宮見梓宮奉遷官行祭

告禮如儀既奉遷梓宮至享殿拂拭安奉訖奉遷官于前行禮如儀先一日設大昇輦於享殿門外奉遷官行啓奠禮如儀行祖奠禮如儀靈駕進發至陵園門外升大昇輦奉遷官行遣奠禮如儀將至陵有司先設席享殿於茂陵獻殿之右大昇輦至詣享殿安奉奉遷官行安神禮如儀百官陪拜遣官以祔葬祭告后土并天壽山別遣官祭告長陵獻陵景陵裕陵奉遷官行遷奠禮如儀靈駕赴玄宮內侍捧謚冊寶以次陳列冥器內執

事官陳酒饌於皇堂門外奉玉帛案置香案奉遷官受玉帛獻畢以授內執事捧入皇堂俯伏興四拜遂掩玄宮奉遷官行享禮如儀禮畢祭謝后土并天壽山及祭告憲宗純皇帝別遣官以祔葬畢告長陵獻陵景陵裕陵凡奉遷官行禮俱內侍導

弘治十七年三月壬戌聖慈仁壽太皇太后喪上素服詣太皇太后宮舉哀哀止括髮設奠復舉哀畢歸喪次英廟皇妃皇太后憲廟皇妃皇后皇太子親王宮主王

妃舉哀各歸喪次次日上舉哀朝夕設奠英廟皇妃皇
太后以下哭臨次日上束髮素服設奠奉安梓宮設几
筵上哀服祭英廟皇妃皇太后以下皆成服各祭一在
京文武官聞喪之三日詣清寧門外哭四日具哀服哭
臨三日在署視事孝服命婦哭臨俱如儀上御西角門
朝退召大學士劉健李東陽謝遷至煖閣素幄中上起
立曰陵廟事且商議健等奏曰昨太監扶安傳諭孝莊
睿皇后葬未合禮欲為釐正此盛德事臣等仰見皇上

聖孝高出前古上袖出裕陵圖一紙指示曰此未合禮
昨見成化年彭時姚夔輩奏章先朝大臣忠厚為國如
此先帝亦甚不得已耳健等對曰誠如聖諭今日斷自
聖衷萬世有光上曰欽天監言風水朕已面折之今日
開壙合葬不為動風水乎皇堂不通則天地否塞通之
則風氣流通惡得言動惟誠心為之其無害皆奏曰皇
上一念孝誠可以格天吉無不利上曰此事不難祔廟
之禮尤當講健等奏曰先年議已定慈懿太后居左今

大行太皇太后居右合祔裕陵配享英廟具引唐宋故事為證臣等不敢輕議其實漢以前惟一帝一后唐始有二后宋亦有三后並祔者上曰二后已非若三后尤非事宜師古末世不足學太皇太后鞠育朕躬恩德深厚朕何敢忘但一人私耳錢太后乃皇祖冊立正后我朝祖宗以來惟一帝一后今若並祔乃從朕首壞恐後來雜亂無紀極耳健等皆未敢應上曰仍舊則禮未安更之則違先帝意朕思之夜不能寐難于降旨可議行

之健等乃上疏言請下廷議乃議于陵廟神座英廟居
中孝莊居左孝肅居右

四月丁酉上孝肅貞順康懿光烈輔天成聖太皇太后
尊謚冊寶甲辰勅駙馬都尉蔡震護喪英國公張懋督
官軍防護太監苗達總巡視上哀服告几筵丁未發引
上哀服率皇太子以下行啓奠祖奠遣奠禮如儀榮王
送梓宮行朝祖禮己酉梓宮祔葬裕陵庚戌神主還京

嘉靖年行禮

嘉靖十七年十二月章聖慈仁康靜貞壽皇太后崩上
詣慈寧宮舉哀括髮設奠歸喪次文武羣臣哭如儀三
十日禮部言大行皇太后服制二十七日已闋適遇正
旦朝會祭享所當酌議臣等恭擬皇上是日早黑翼善
冠淺淡袍服黑犀帶御殿受朝疏入未下上諭大學士
言元旦玄極殿拜天仍具祭服先一日變服否於是禮
部更請正旦日上拜天受朝及先一日青服孟春享宗
廟前三日奏齋皇上青服臣下同之上覽奏諭內閣曰

部疏未免循故事未見損益何如禮曰三年之喪賢者無改若拘于紙上法度後世君人皆罪人也不但景君一人耳雖山陵未就古人未葬百事皆輟今郊社不敢廢封建征伐賞刑諸事無虛事謂之居喪吾不信也使當如制定服遇郊有事吉服作樂此尊尊也廟有事著淺淡色服不作樂此親親也居他處服黑布至喪次仍素服直候奉引安陵仍用始服之服以終之庶為情實卿等與宗伯翰林院禮科議否即曰否禮部覆皇上析

禮精微為萬世法請令内外一體遵奉報可

初禮部請正旦朝賀三奉旨罷免及是因別疏請上報
曰履端歲首朝會之始但昨方除服梓宮在上卿等屢
以禮請朕謂當行實事于奉天門百官青衣本等帶五
拜三叩首不必公服致詞鐘鼓鳴鞭俱輟之禮部復請
上具翼善冠黃袍御殿百官公服致詞鳴鐘鼓鳴鞭奏
堂上樂上曰改歲更始王者奉順天道不可不重既在
除服外其如議行子刻初朕用祭服于玄極寶殿行告

祀禮前期變服玄色吉衣几筵四七節權命內侍行禮
先是禮部儀注小殮之下有昭聖恭安康惠慈愛皇太
后喪次舉哀之語上覽之註其下曰此未可及成服日
舉祭復于昭聖下增曰遣祭一壇又註曰此俱增遣字
蓋上于典禮明辨如此

上勅諭禮工二部曰朕皇考顯陵在承天山川淺薄堂
隧狹陋今長陵西一支曰大峪嶺茲欲迎皇考遷祔所
司其具儀聞于是禮官具顯陵奉遷大峪興工二儀已

乃命駙馬都尉崔元兵部尚書張瓚太監鮑忠詣承天
迎獻皇梓宮壬子大駕發京師躬視大峪御史陳讓請
奉獻皇遺衣冠與章聖太后合葬於大峪又以章聖遺
冠帔合葬于顯陵上曰並建二陵用衣冠交葬從古所
無尤見乖謬黜為民上猶以遷陵事于心未安復諭輔
臣曰朕復思一夜中心甚懼奉體藏魄二十歲忍啓露
風塵掛途路茲欲奉慈宮南詣合葬朕且躬往禮官當
亟上議

成化三十三年十月己卯孝宗初即位諭禮部臣曰朕以涼德獲嗣丕基哀疚凡內而尊崇大禮外而撫綏大猷次第舉行痛惟朕生母恭恪莊僖淑妃鞠育劬勞恩深罔極今賴三靈之佑託於億兆臣民之上奉養莫逮風木之感實切於衷矧議政之初聖慈仁壽太皇太后皇太后咸謂母妃須進名位式昭慶源因令輔臣考據春秋大義前代英君明辟定典乃請於二聖欲遣官奉冊詣園陵尊為皇太后用垂隆名於永世俟皇考梓宮

發引有期預啓祔葬庶少罄孝悅于萬一爾禮部具儀
擇日以聞壬辰追進聖母淑妃為孝穆慈慧恭恪莊僖
崇天承聖皇太后遣官詣園陵行恭上冊寶并祭告禮
十一月聖母孝穆皇太后即祔葬茂陵上勅諭禮部曰
皇妣孝穆慈惠恭恪莊僖崇天承聖皇太后祔葬畢日
宜有奉享神主之禮爾禮部其會文武大臣議處來問
於是禮部會同大傅兼太子太師英國公張懋等官議
得周禮春官大司樂之職歌小呂舞大濩以享先妣謂

姜嫄也至宋則元德懿德二皇太后俱有別廟之享章獻章懿二皇太后遂有奉慈之建茲者恭遇孝穆皇太后祔葬茂陵所有神主宜於奉先殿傍近宮室改為別廟以禮安奉歲時祭享悉如太廟奉先殿之儀仍乞勅奉遷官於祔葬畢暫奉神主于茂陵獻殿以伺二十四日憲宗純皇帝祔廟禮畢啓行於二十六日入城得旨奉先殿傍近無宮室堪改別廟爾還再議來聞禮部復會官議孝穆皇太后祔葬畢日神主宜暫建別廟奉享

庶合古制但奉先殿傍既無傍近宮室堪以改作合當
於享憲宗純皇帝几筵之右別設幄殿一所以事奉享
仍乞勅內官監相度相應吉地營建別廟完日奉遷神
主享祀如儀上曰親終當祭以禮爾等既考論明白准
議乃定奉安神主之殿曰奉祀殿

弘治十七年三月聖慈仁壽太皇太后崩上朝夕不離
喪次悲哀動中外越五日文武百官請初七日視朝上
批荅曰朕哀痛方切未能視朝所請不允次日再請又

批荅曰朕朝夕喪次未忍暫離卿等乃累疏懇請謹遵遺詔初八日視朝至日上服縗服御西角門二十七日服滿二十八日百官易烏紗帽黑角帶青圓領皂靴侍朝上仍白翬善冠白袍腰經御西角門視事俱不鳴鐘鼓宮中實行三年之喪蓋上天性純孝初至東宮進學時講官以文華大訓進講上輒起立俟講畢乃復坐其事太皇太后奉養尤極尊隆有疾親侍湯藥憂形於色事皇太后亦然四月庚申上傳旨諭禮部臣曰朕制雖

遵遺誥中心哀痛未忍盡從吉典每月朔望日暫免陞殿百官常服於奉天門朝參遇節免宴百官勿著紅衣凡大節免行慶賀禮各王府并南京及在外各衙門預行文知之不必差官赴京

弘治十七年三月孝肅皇太后崩內閣大學士劉健等題臣等竊惟事莫大於送終禮莫重於祀享茲者大行聖慈仁壽太皇太后鸞馭上升山陵伊邇祀享之禮宜預講求查得成化四年間慈懿皇太后崩逝之日羣臣

會議有二后並配之文竊惟當時先帝遇天下難處之事羣臣為委曲將順之詞或者猶不能無疑焉然奏議雖成於當時而奉行則始於今日仰惟皇上承宗祧之重為綱常之主所宜至詳至慎而不可少有忽焉者也伏望特勅禮部集議稽本朝祖宗之廟制質古先聖王之訓典務合大公允歸至當俾行之于今而無憾垂之萬世而有光臣等不勝至願上命禮部會多官稽考典制詳議奏聞禮部乃會皇親公侯駙馬伯五府六部都

欽定四庫全書

禮部志
卷八十六

五

察院通政司大理寺翰林詹事府左右春坊司經局六科十三道等衙門議謂宗廟之禮乃天下之公義非子孫得以私之萬古綱常有不可易者自古昔以來殷周七廟父昭子穆各有配座一帝一后之正儀蓋陰陽相配之禮也下至春秋以魯隱之國而書考仲子之宮胡安國傳云孟子入惠公之廟仲子無祭享之所以此觀之春秋之世去先王之世未遠魯秉周禮先王之制猶有存者祖廟無二配故也先王之制槩見已伏覩憲宗

純皇帝成化四年勅諭羣臣有曰朕心終不自安竊窺
我先帝之至情以重違慈意不得已而勉從羣臣並配
之義羣臣欲權以濟事亦不得已進此議也據正禮而
區處適宜仁至義盡足以上副先帝在天之遺志端有
待於今日稽之周禮有祀先妣之文疏云姜嫄也是則
太母特立廟以祀不失尊崇之禮自周然矣詩所謂閟
宮是矣唐宋禮制無常初正終亂固無足言但其間推
尊太后不配食祖廟者則別立殿以享之亦得閟宮之

欽定四庫全書

卷八十六

義至我國朝祖宗太廟之建一遵古典損益得中迄今已湓九廟廟皆有配其配無二宏規遠模成憲已定又於禁廷內建奉先殿得以朝夕供薦孝思之情委曲詳盡仰惟皇上繼統動率舊章而舉無不宜茲遇大行聖慈仁壽太皇太后上仙朝夕不離喪次悲哀動乎中外傳之萬方誰不感仰聖孝之無已也但孝心無窮而禮有限節享祀之禮當歸於至當所有奉安神主宜於奉先殿之外相應處所建一新廟如詩之閟宮宋之別殿

歲時薦享一如太廟奉先殿之儀祀專而且近禮勤而
且便隆名徽號仍稱太皇太后極其尊崇永受萬年之
享則情義兩盡罔極之思以酌嚴祖之道以著而大孝
之實垂諸萬世無疆矣上曰享祀重事禮當詳慎卿等
稽考古典及祖宗廟制既已明白都準議特建廟奉享
仍稱太皇太后以伸朕尊親之意後世子孫遵守崇奉
永為定制

皇后喪禮

洪武初定

洪武十五年八月庚子上以慈孝皇后喪萬機委積乃命禮部臣考古典遵以日易月之致以素饘祭告于皇后之靈曰自后崩逝已十有五日雖哀慟無窮而天下事重不敢久曠不治謹遵禮制以日易月朕釋期服視朝諸子仍哀麻以奉筵几惟靈其鑒之

九月庚午發引上親致祭于靈文武百官喪服詣朝陽門外奉辭是日安厝皇堂皇太子奠玄纁玉璧行奉辭

禮神主還宮文武百官素服迎于朝陽門外回宮百官行奉慰禮上復以醴饌祭於几筵殿自再虞至九虞皆如之是晚仍遣醴饌告謝于鍾山之神命所葬山陵曰孝陵

十月己卯以孝慈皇后卒哭行祔廟禮上以醴饌致祭於靈復以牲醴告廟曰茲以孝孫婦孝慈皇后馬氏神主詣廟祇謁嘉薦祔享之禮

十一月乙丑喪百日上輟朝以牲醴致祭於几筵殿是

日紀察司請御素服黑犀帶上香案前致欽不拜東宮親王皆四拜奠帛奠爵上舉哀在位者皆哭哭止上致欽如前東宮以下復四拜上還宮百官素服黑角帶詣中右門俟奉慰上素服出陞座儀禮司官致詞奉慰東宮親王復以牲醴祭孝陵公侯等從祭妃主亦詣靈祭其命婦則詣几筵殿祭奠

永樂年行

永樂五年七月文皇后喪禮初喪如高后時儀定各王

及公主服制世子郡王皆齊衰不杖期世子妃郡王妃并郡主皆大功周楚諸王及寧國諸公主并郡王之子皆小功遣中官以大行皇后訃告趙王高燧及永安公主永平公主并召赴京遣官訃告各王府

十一年正月丁酉仁孝皇后梓宮發引皇太子漢王送梓宮渡江皇太子哭辭漢王護梓宮行途中朝夕哭奠如儀官民迎祭者皆素服

嘉靖年行

嘉靖七年七月皇后陳氏崩禮部上喪祭禮儀上疑過
隆令更議部臣具累朝舊儀恭酌上請上躬自裁定以
示閣臣曰聞喪次日百官素服於思善門橋南哭臨又
次日亦如之第四日成服百官服喪服入臨如前三日
免哭臨蓋遵皇太后之意第四日朕視朝百官素冠服
行奉慰禮二十七日後百官黑冠素服角帶朝恭發引
後從吉如遇七及小祥大祥皆淺色衣朝恭初喪三日
朕不視朝如常朝儀兩宮服淺色衣玉帶蓋盡事親之

道第四日成服為始朕冠翼善冠素服犀帶視朝一十
二日盡杖期以日易月之義前後共二十七日俱西角
門視朝服淺色衣百官黑冠素服之日於奉天門視朝
俱不鳴鐘鼓如遇朝兩宮之日則具常服以盡尊親之
禮制下閣臣張璪等擬上服制宜服素冠服經帶十二
日其後乃服翼善冠犀帶前後二十七日俱御西角門
視朝之日百官皆素服經帶二十七日以後上御奉天
門百官乃更素服角帶上意既允已復降旨曰朕當黑

冠素服降之九日而釋可矣璵等對曰皇上以兩宮皇太后在上不敢以卑加尊是以欲為降殺非故嗇恩也臣竊謂夫婦之倫參三綱而立人君為綱常之主言動世為法則尤不可不慎臣讀記曰天子之於后猶父之與母也故謂天王服斬衰父之義也為后服齊衰母之義也又謹按昭公十五年六月乙丑周景王太子壽卒秋八月戊寅王崩叔向曰王一歲而有三年之喪二焉蓋古禮父為子夫為妻皆服三年觀此則周天子尚為

后服三年之服後世夫為妻始制為齊衰杖期父母在則不杖夫喪服自期以下諸侯絕然特為旁期言若妻之喪本自三年報復殺為期年則固未常絕也皇上為后服期以日易月僅十三日臣子為君母服三年以日易月僅二十七日較諸古禮已至殺殺而又殺則無矣臣愚以為皇上宜服期十二日宜容臣子素冠服終二十七日不然則恩紀不明典禮有乖臣等何忍令後日史臣書曰天子不成后服自皇上始乎又何忍令後日

史臣書曰臣子不終君母之服自臣子始乎上曰卿所奏雖出忠愛似未精詳倫理朕豈敢違孝卿勿過慮時禮臣方獻夫亦雜引儀禮喪服等篇反覆爭辨謂旁期可降正期不可降亦舉周景王為后三年之文及三朝聖諭所載仁孝皇后崩太宗皇帝哀服後仍服數月白衣冠故事以證之上曰文皇帝之與文皇后喪禮與今大不同爾時上無皇母下有東宮從重盡禮為宜其遵朕欽定儀制行之已詹事霍韜奏曰臣頃見禮官所議

大行皇后喪禮臣昨與面諭勸其更議禮官以臣為迎
合臣獨以為臣子議朝廷公事各盡其道而已天子之
有后猶天之有地故禮曰夫為妻服期萬世之經也因
禮之變而酌義之中則有權是故中宮皇后者配陛下
者也所以共事天地而承祖宗者也陛下為之服凡以
為天地祖宗之故也然限於陰陽內外之辨則有不得
盡致其情者矣今百官遭妻之喪無服哀蒞事之理惟
三年之喪乃釋位行服蓋謂父母之喪達於上下若妻

之喪則內而不外陰不可以當陽也在百官則然至于
陛下何獨不然聖諭曰素服十日倣輟朝之義臣則曰
為皇后服禮也然於內廷行之可也若對臨百官總理
萬機履當陽之位行中宮之服或不可也蓋制服于內
可以自盡素服于外特以示變權而得中所以為禮也
百官有司為皇后服哀為其母儀天下也上壓于陛下
則有不得盡致其禮者矣古禮父在為母杖不上于堂
尊父也為衆人言之也至於朝廷何獨不然臣請陛下

玄冠素衣御西角門十日即玄冠玄衣御奉天門百官
有司入左掖門則烏帽玄衣侍班奏事退出公署及居
私室仍素服白帽二十七日而除若曰於禮猶有未慊
也則山陵事畢而除其入見陛下玄服者杖不上堂之
義也出即素服者子為母之義也若陛下於二十七日
俱御西角門則混而無辯臣下素服朝于中宮門則瀆
而不敬皆非時義之宜也此于古禮所未有可以義裁
者也禮官所執者古禮臣所權者時宜禮官所言類于

從厚臣言類於從薄要之人極大中萬世自有能辨之者上曰喪服禮制朕已兩定儀注下禮部行韜所奏斟酌時宜當從所擬朕于十五日常朝奉天門視朝百官淺淡色衣朝叅退仍如制服二十七日而除

閏十月禮部尚書方獻夫等上悼靈皇后儀注時諸禮儀皆上親自裁定類從減損如百官哭臨及禁屠徹樂當于發引三日之前梓宮出當端門行辭祖禮從午門等中門出時哭臨既止一日辭祖又復罷免而梓宮命

由左王門以出於是禮科都給事中王汝梅等上疏言
天子有后以共承天地祖宗之祀奉兩宮之歡如天之
有地日之有月今皇后已正位七載齊體至尊生以禮
歸歿不以禮葬非所以重大倫為萬世法請更議之上
曰是所言亦係忠愛但未審重輕思善門哭臨逼近仁
智殿從減可也午門等中門亦當避所尊陵地既遠于
列聖則辭祖之禮不必瀆朕已祭告內殿矣夫后尊則
主益尊朕豈不知第有所壓不得不斟酌裁制耳既而

給事中徐景嵩又言哭陵辭祖二儀不輕議若梓宮出門乃萬姓觀瞻所係王門之議臣心實不敢安也詔如前旨發引次日上命經筵官吉服侍班尚書方獻夫等以為山陵未畢不忍遽爾從吉請仍令百官衣淺色衣朝參上不許曰朝廷禮儀自有定制卿等餘哀未忘可退朝後行之無何遣官冊封故事當鳴鞭作樂百官朝服侍班獻夫復言皇后之喪大樂一作恐聖心增感宜輟樂上怒其違旨命照舊行

嘉靖二十七年二月癸丑上以孝烈皇后陵名未定諭
輔臣曰朕思太祖成祖俱二后先安玄宮其陵名薦在
何時令禮臣窠以故事聞窠具奏洪武十五年九月十
三日孝慈皇后葬孝陵永樂十一年二月十六日仁孝
皇后葬長陵皆命名在先卜葬在後於是上定孝烈皇
后陵名曰永陵仍御製祝文命成國公朱希忠告太廟
五月丙子禮部上言曩孝潔皇后梓宮入百官自執事
外俱哀服送至土城祭畢更常服辦事迎主用烏紗帽

素服但孝潔皇后自發引至神主還京將及半月相遇
元旦百官宜從常服今孝烈皇后初十日發引十五日
即還事體不同請令祭畢還京諸臣除入朝外俱素衣
烏紗帽角帶辦事至神主還京而除上曰昔有兩宮在
臣從君敬其所尊厥禮是矣今日卿等有母事之儀隨
喪往來者仍當制服祭畢回者以烏紗帽素服入朝素
冠素服辦事迎主仍制服思善門外行安神禮更素冠
素服從事

五月詔孝烈皇后梓宮入山陵居之右虛其左先是上命后與孝潔皇后啓安禮併舉孝烈居左既而孝潔啓安禮至是部臣以玄宮規制請得旨乃更啓孝烈仍居右云

慈宮發引

嘉靖十八年五月內禮部題為喪禮事節奏聖諭恭奉慈宮引發吉日用五月十七日子時奠獻使等官仍用原定官員一應禮儀亦且用原定者如有增損臨期酌

擬但改水程奉梓宮行欽此臣等謹將慈宮引發二聖合葬禮儀查將原定節次量加增損謹逐一再行開生上請其題主一節原於德勝門外梓宮東行恭擬于通州奉題以次日回京其奉送梓宮官員原係陸行本部定擬三程分送今改用水程合無送至張家灣恭祭而回及原定至承天府各執事官太常寺光祿寺鴻臚寺錦衣衛科道等衙門俱照舊差遣外其禮兵二部司屬官今以堂官掌禮勲臣領兵則二項屬官應合裁省伏

乞聖明裁奪奉聖旨奠獻使等官仍用原定主著輔臣
鼎臣恭題畢遣成國公希忠奉主還京餘都依擬欽此

慈宮南祔

嘉靖十八年五月內禮部題為喪禮事本年四月二十
八日欽奉聖諭南巡因謁陵寢及視大峪已畢然峪地
空淒豈如純山完美決用前議奉慈駕南祔引發吉辰
別候欽此臣等謹將慈宮引發二聖合葬禮儀查照原
定節次量加增損逐一再行開坐上請

計開

一欽定本年五月十七日子時發引梓宮自通州登舟
直抵承天俱水程

一張家灣祭潞河之神天津祭海口之神安平鎮祭龍
王之神徐州呂梁二處祭洪神淮河口祭淮瀆之神儀
真南京祭大江之神彭澤祭小孤山之神九江漢江所
過大江俱用牲醴致祭俱勲臣具青服行禮其各應祀
水府之神開載未備者臨時增酌致祭

一經過有王府去處許王素服出迎致祭該府官預陳設祭物于水次席殿內贊唱就位贊鞠躬贊四拜興詣香案前跪上香畢復位跪奠帛初獻爵讀祭文再獻終獻畢俯伏舉哀五聲而止贊四拜興平身焚帛禮畢

一王府附近去處遣輔導官致祭先于席殿陳設祭物候梓宮至執事官贊四拜興贊上香畢復位跪奠帛三獻爵讀祭文俯伏舉哀哀止興四拜平身焚祝帛禮畢一南京守備文武衙門各處鎮巡三司官梓宮舟經及

附近處所俱致祭舉哀興王府遣官儀同有司所轄大小官員通許陪拜

一致祭物品簇盤一座豕一羊一果五盤點心五盤飽
燂五盤餅五盤案酒五樣菜五盤粉湯五盃飯五盞帛
一段酒三爵香紙燭

一至承天百官俱縗服奉迎梓宮舟岸少住舉哀前後
八拜禮師生耆民人等隨班行禮

一行安神禮撫按等官陪拜鴻臚寺傳贊行禮同

皇嫂喪禮

嘉靖十四年正月武宗莊肅皇后崩上命禮部具喪祭儀尋遣中官諭曰喪禮視聖慈仁壽太皇太后制行於是禮部上儀注有上素冠素服經帶舉哀及羣臣奉慰禮上曰朕於皇兄無服制矧奉兩宮皇太后在上又迫聖母壽旦忍用純素服青服視事諸儀再擬聞於是禮部尚書夏言等上言大行莊肅皇后喪禮在臣民無容議惟是皇上天子之尊服制既絕則不必臨御西角門

一切奉慰皆不當舉羣臣成服後又不當服素朝叅情
因當伸尊尤當避宜免朝叅便因復除二十七日發喪
二十八日大殮上素服詣大行前行設奠奉安神宮設
几筵安神帛立銘旌上詣梓宮前祭憲廟皇妃昭聖康
惠慈壽皇太后章聖慈仁皇太后武廟皇妃中宮皇妃
九嬪公主等各祭一百官命婦哭臨如故制可復諭言
等聖母壽辰爾百官不必赴公所只私所盡制大學士
張杻敬等言聖母壽旦禮吉之至重者宜吉衣終日庶

于禮義允協上悅其體君忠敬從之

皇妃喪禮

洪武初行

洪武七年九月貴妃孫氏薨命吳王橚服慈母服斬衰三年以主喪事勅皇太子及諸王皆服期有司營葬厝於朝陽門楮岡之原

成化年行

成化十一年六月皇祖母紀氏薨追封淑妃謚恭恪莊

僖輟三日朝上服淺色衣御奉天門視事命禮部定喪葬儀注先是妃病大學士商輅言皇子母有不諱禮宜從厚仍乞司禮監奉皇子問侍哀服行禮上是之乃命司禮監黃賜詣問儀八月葬恭恪莊僖淑妃紀氏于山西自初喪至發引下葬上及皇太后中宮英廟皇妃皇妃親王公主皇子各有祭遣皇子奉祝冊行營城發引下葬日上俱不視朝皇親公侯駙馬伯文武百官及命婦送葬設祭如常儀

嘉靖年行

嘉靖三十三年正月康妃杜氏薨裕王母也禮部尚書
歐陽德言累朝皇妃薨或未生皇子或子非長或子為
東宮而先薨俱與今異惟成化中淑妃紀氏薨所生皇
子倫序居長與今相類彼時皇子尚幼今裕王已婚禮
宜持服主喪送葬出城乃議輟朝五日裕王遵孝慈斬
哀三年欽定大臣題主開塋掩壙祠謝后土并用工部
官送葬儀仗人數皆增于舊上謂大學士嚴嵩等曰部

擬憲廟淑妃大不同裕王不當服斬哀嵩等對憲廟初有悼恭太子在前淑妃之子居次正與康妃今日同喪禮必子為主裕王宜服斬哀以執饋奠之事太祖御製孝慈錄序文曰庶子為其母斬哀三年部儀遵此也上復諭嵩斬哀三年當避君父嵩言洪武七年貴妃孫氏薨無子命吳王橚服慈母服斬哀三年主喪事皇太子諸王皆服期是年孝慈錄成遂為定制乞命殿下哀杖入哭几筵居府盡制上意猶未以為然乃下部䟽曰輟

朝兩日不鳴鐘鼓上淺淡色衣奉天門視事百官淺淡衣烏紗帽黑角帶朝叅欽命裕王主饋奠之事裕王率妃入宮素服哭盡哀四拜小殮大殮成服朝夕哭臨三日以後每日一奠通前二十七日而止仍于燕居斬哀三年以伸子情妃詣拜位贊四拜奠酒讀祝贊四拜舉哀興哀止望瘞禮畢其焚黃陳祭儀以祝文及謚冊文置前裕王四拜三獻發引啓奠祖奠遣奠御祭各一柩出玄武門裕王步送至京城門外路祭畢還宮百官素

服烏紗冠帽黑角帶路祭入上曰焚黃乃制命非王可行其仍以常禮從事餘如擬部覆奏皇妃焚黃儀傳訛非一日蓋自累朝或所生皇子及親王或司禮監官行禮皆拜而獻酒跪而讀祝乃叅用上尊謚之儀而未思賜謚為制命其祭文稱皇帝遣諭與上尊謚迥不同也今既奉旨以常禮從事當改議賜謚祭禮讀祝宣冊皆平立不拜上報可乃著為令遂冊謚妃為榮淑

九妃同墓

嘉靖三十年六月禮部左侍郎程文德奉詔相睦妃何氏瑩城因言金山一帶壟地無餘宜與故妃包氏陳氏同窆且二妃之逝已奉聖諭令同一地為墓又言憲廟諸妃皆同處者且省民力一分仁言惻怛聞者感動今壙域甚廣附造為便上曰祖宗成法當守王制亦當尊古世婦御妻數俱用九其自今以九妃同墓共一享殿而中為七室所司如議奉行

皇太子喪禮

妃附

成化年行

成化八年正月皇太子薨年三歲上召禮部臣諭之曰
皇太子年幼喪禮宜從簡禮部具儀上自發喪日為始
服翼善冠素服七日而除發喪後三日皆不視朝又三
日上御西角門朝不鳴鐘鼓祭用素食文武羣臣聞喪
素服烏紗帽黑角帶第三日素服麻布經帶麻鞋布裏
紗帽詣思善門哭臨一日而除第四日素服朝西角門
行奉慰禮以書訃告天下諸王天下王府并文武官素

服于廳視事再舉哀復再拜次日服布裏紗帽麻鞋經帶設香案舉哀行禮服素服烏紗帽黑角帶二日而除
皇太子妃喪

洪武十一年十一月皇太子妃常氏薨上素服輟朝三日中宮素服哀臨皇太子服齊衰葬畢焚于墓所常服還命皇孫服斬衰置靈座傍遇祭奠則服之諸王宮主服如制

諸王喪禮

洪武初行

洪武二十八年三月秦王樸薨王上第二子孝慈王后所生也年十五受封二十三之國至是薨年四十計聞詔定喪禮禮部尚書任亨泰奏曰臣考之宋制宜輟朝五日今遇時享宜暫輟朝一日皇帝及親王王妃宮主世子郡王郡主及靖江王世子郡君服制皆與魯王喪禮同皇太子服齊衰期年因親事以日易月亦十三日而除素服期年從之喪聞上輟朝三日禮部奏差官掌

行葬祭禮翰林院撰祭文謚冊文壙誌文工部造銘旌
差官造墳又欽天監官一員上葬日國子監監生八人
報訃各王府御祭一壇太皇太后皇太后東宮各一在
京文武官各一壇御祭凡七壇封內文武祭一壇非封
內者不弔祭其服制王妃世子衆子及郡主郡王下至
宮人斬哀三年封內文武官齊哀三日哭臨五日而除
在城軍民素服五日郡王衆子郡君為兄及伯叔父齊
哀期年郡王妃服小功五月凡世子世孫喪禮聞喪御

祭一東宮祭一七七百日下午葬周年二周年除服御祭
各一翰林院撰祭文謚冊壙誌文工部造銘旌國子監
監生報計

公主喪禮

洪武初行

喪聞上輟朝一日御祭一皇太后中宮東宮各祭一各
公主共祭一翰林院撰祭文壙誌文戶部給齋糧工部
造銘旌神主魂帛棺槨墳壙誌石冥器儀仗欽天監選

地擇日國子監監生報訃御祭凡六下葬靈柩由東上南門東上北門北中門北安門出工部內監官於坟所設享堂教坊司撥女樂送至墳所祀后土并題主安神俱遣大臣行禮

臨朝不釋服

洪熙元年九月禮部尚書兼太常寺卿呂震奏太宗皇帝遣命喪服一如太祖高皇帝倣漢制以日易月今已踰二十七日請上釋哀服服烏紗冠素服黑角帶臨朝

上不聽命與六部都察院詳議以聞震與六部都察院共奏上宜服素冠黑角帶羣臣皆從君服上曰梓宮在殯朕何忍遽易自是臨朝素冠麻衣麻經朝退仍哀服不受冬至賀

洪熙元年十一月太子太保兼禮部尚書呂震奏冬至節請御正殿受賀上曰梓宮在殯山陵未終因時興慕哀慟愈切慶賀之禮豈所宜言勅免賀

成服不視事

成化改元禮部奏茲者大行皇帝喪禮成服已畢恭惟
皇上嗣登大寶之初萬機所係宜少節哀情請于西角
門視事上不允曰朕不忍遽出待二月朔可也

諸王葬禮

成化七年禮部奏忻王發引禮儀一發引日上不視朝
一下葬輟朝一日不鳴鐘鼓上服淺淡顏色服於奉天
門視事一起靈祭祀如去喪例一過內門外門并過橋
祭一文武官員共祭一壇於西安門外行禮一開塋域

下葬祠后土掩壙題主神主奉安享堂各御祭一壇一
凡葬百日周年二年除服每祭如起靈例行禮俱遣中
官外門遣太常寺官祭從之

王殤女喪禮

嘉靖三十三年裕王長女殤禮部議祭葬請如順義郡
主例上以未請封無例而且下殤也用全禮非是詔減
常儀之半

追封世子喪禮

嘉靖三十八年裕王長子薨大學士嚴嵩等言親王之
子曰世子今若稱長子是與郡王之子同也乞特賜追
封庶于典禮為合上命追封為世子祭葬視世子已封
者例

皇子喪禮

成化二年十一月皇子薨上諭禮部曰皇子薨逝朕甚
感傷祭葬之禮其斟酌以聞于是禮部議按禮八歲以
下為無服之殤祭葬禮儀俱合從簡祭不用牲用素饌


出殯日上服淺淡服明日百官行奉慰禮

皇太子葬禮

嘉靖三十年上諭禮部皇貴妃王氏同閻氏墓葬哀冲
莊敬二太子祔其旁冲幼兒隨母禮以義起俱入天壽
山以上近祖宗之義也便擇日舉行禮部因言曩貴妃
閻氏已祔主于孝潔皇后陵室今葬者既與同窆固宜
祔二太子之墓既宜近母則其主亦宜安祔二妃左右
詔可

皇女喪禮

弘治十年九月皇女太康公主薨禮部上喪禮事宜上
命照蔚悼王喪禮例行免輟朝并奉慰禮



禮部志稿卷八十六

欽定四庫全書

史部

禮部志稿卷八十七至九

詳校官監察御史臣龔驂文

編修臣程嘉謨覆勘

總校官知縣臣楊懋珩

校對官中書臣高 中

騰錄監生臣李 玠

欽定四庫全書

禮部志稿卷八十七

明 俞汝楫 編

喪禮備考

職官喪

期年不奔喪

洪武二十三年閏四月甲戌除期年奔喪之制先是百官聞祖父母伯叔兄弟喪俱得奔赴至是吏部言祖父

母伯叔兄弟皆係期年服若俱令奔喪守制或一人連值五六月期喪或道路數千里則居官日少更易繁數曠官廢事今後除父母及祖父母承重者丁憂外其餘期年服制不奔喪從之

期功迴避與祭

嘉靖十三年孟冬享廟先期命侍郎顧鼎臣霍韜皆有期功之服上言古禮期服諸侯絕大夫降今之公卿即古之諸侯而猶有期服非禮也律言總麻以下皆不與

祭者謂其身蒞之也百官聞期年之訃不過私家為位
及踰旬月則無庸避矣上令禮官考議以聞於是尚書
夏言奏封建法廢世無諸侯久矣古之諸侯建邦啟土
世有其國伯叔兄弟皆其臣也故期服可絕不知今之
公卿能臣其伯叔兄弟乎又曰在位則為公卿釋位則
為族屬不知喪服之制人情之所由生也豈以在位釋
位為隆殺哉夫哀有淺深故服有輕重祭祀吉禮致敬
神明若情未忘哀則不專誠於祭故不與也禮曰小功

總麻執事不與禮言小功總麻但可執事至饋奠之禮重則不敢與也今二臣小功麻服之重者也太廟捧王又禮之重者也以服之重而與禮之重者得謂知禮乎詔鼎臣韜迴避以侍郎黃宗明林廷楫代之且令自後廟享前五日太常寺即奏奉主官十餘人以請

三年不得奪情

景泰二年吏科給事中毛玉奏禮部郎中章綸三年之喪古今通制向者朝廷因各邊未寧暫行奪情之典所

留者皆股肱輔弼之大臣邊徼經營之要職近者各處
官司相習成風或司府佐貳之官或州縣幕司之職甚
至辦事官吏一聞親喪即行保舉奪情且金革之變禮
不可施之於平世矧今聖明蒞政之初法令大新之日
前項官吏素非執政之臣輕引奪情之例保留章奏絡
繹道途雖蒙明斷不允亦已煩瀆聖聽乞勅該部將綸
奏准事例通行內外俾皆遵守庶敦廉恥之節以消奔
競之風從之

通喪制

孝慈錄服制

洪武七年十一月孝慈錄成先是貴妃孫氏薨勅禮部議服制禮部尚書牛諒等奏曰周禮儀禮父在為母服期年若庶母則無服上曰父母之恩一也而低昂若是不情甚矣乃勅翰林院學士宋濂等曰養生送死聖人大政諱亡忌疾哀世陋俗三代喪禮散失於哀周厄於暴秦漢唐以降莫能議此夫人情無窮而禮為適宜人

心所安即天理所宜爾等其考定喪禮於是濂等考得
古人論服母喪者凡四十二人願服三年者二十八人
服期者十四人奏之上曰三年之喪天下之通喪令願
服三年視服期年加倍豈非天理人情之所安乎乃立
為定制子為父母庶子為其母皆斬衰三年嫡子衆子
為庶母皆齊衰杖期仍命以五服喪制著為書使內外
遵守其冠服經杖制度詳見本書

喪禮禁令

洪武五年詔古之喪禮以哀戚為本治喪之具稱家有
無近代富者奢侈犯分力不及者揭借財物炫耀殯送
惑於風水停柩經年不行安葬宜令中書省集議定制
違者論罪

俗喪禁令

洪武元年十二月辛未監察御史高原讐言京師人民
循習元氏舊俗凡有喪葬設宴會親友作樂娛尸惟較
酒殺厚薄無哀戚之情流俗之壞至此甚非所以為治

且京師者天下之本萬民之所取則一事非禮則海內之人轉相視倣弊可勝言況送終禮之大者不可不謹乞禁止以厚風化上是其言乃詔中書省令禮官定官民喪服之制

禁喪葬僭侈

洪武三年禮部尚書崔亮言禮所以辨上下防奢侈也今喪葬之禮自公侯卿大夫至於士庶各有等第然其間儀制上可以兼下下不可以僭上力雖有餘不得過

度力不足者稱家有無不拘常例從之

品官喪制

庶民附

洪武五年禮部奏定文武品官喪禮 襲衣三品以上

三襲四品五品二襲六品以下一襲 飯含五品以上

飯用稷含用珠九品以上飯用粱含用小珠 銘旌以

絳帛為之廣一幅四品以上長九尺六品以上長八尺

九品以上長七尺 斂衣品官朝冠朝服一襲常服十

襲衾十番命婦大衫褙子一襲常服十襲衾十番 靈

座設於柩前用白絹結魂帛以依神 棺槨品官棺用
油杉朱漆槨用土杉槨翼公侯六三品以上四五品以
上二 明器公侯九十事一品二品八十事三品四品
七十事五品五十事六品七品三十事八品九品二十
事 引披鐸引者引車之紼也披者以纁為之繫於輻
車四柱在傍執之以備傾覆者也鐸者以銅為之所以
節挽歌者公侯四引六披左右各八鐸一品二品三引
四披左右各六鐸三品四品二引二披左右各四鐸五

品以下二引二披左右各二鐸 羽旛竿長九尺五品
以上一人執之以引柩六品以下不用 功布品官用
之長三尺 方相四品以上四目七品以上兩目八品
以下不用 柳車上用竹格以綵結之傍施帷幔四角
垂流蘇 誌石二片品官皆用之其一為蓋書某官之
墓其一為底書姓名鄉里三代生年月及子孫葬地婦
人則隨夫或子孫封贈二石相向用鐵束埋墓中 碑
碣功臣歿後封王螭首高三尺二寸碑身高九尺濶三

尺六寸龜趺高三尺八寸一品螭首高三尺碑身高八尺五寸濶三尺四寸龜趺高三尺六寸二品蓋用麟鳳高二尺八寸碑身高八尺濶三尺二寸龜趺高三尺四寸三品蓋用天祿辟邪高二尺六寸碑身高七尺五寸濶三尺龜趺高三尺二寸四品圓首高三尺四寸碑身高七尺濶二尺八寸方趺高三尺五品圓首高二尺二寸碑身高六尺五寸濶二尺六寸方趺高二尺八寸六品圓首高二尺碑身高六尺濶二尺四寸方趺高二尺

六寸七品圓首高一尺八寸碑身高五尺五寸濶二尺
二寸方趺高一尺四寸 墳塋功臣歿後封王塋地周
圍一百步每面二十五步墳高二丈四圍墳牆高一丈
石人四文武各二石虎羊馬望柱各二一品塋地周圍
九十步每面二十二步半墳高一丈八尺墳牆高九尺
石人二文武各一石馬虎羊石望柱各二二品塋地周
圍八十步每面二十步墳高一丈六尺墳牆高八尺石
人石虎羊馬石望柱同一品三品塋地周圍七十步每

面一十七步半墳高一丈四尺墳牆高七尺石虎羊
馬石望柱同二品四品塋地周圍六十步每面十五步墳
高一丈二尺墳牆高六尺石虎羊馬石望柱同三品五
品塋地周圍五十步每面一十二步半墳高一丈墳牆
高四尺石羊馬石望柱各二六品塋地周圍四十步每
面一十步墳高八尺七品塋地周圍三十步每面各七
步半墳高六尺祭物四品以上用羊豕九品以上用
豕庶民襲衣一用深衣一大帶一履一雙裙褲衫襪

隨用飯用梁含錢三銘旌用紅絹五尺斂衣隨所用衣
衾及親戚祔儀棺隨所用堅木油杉為上栢欂之土杉
松木又次之用黑漆金漆不得硃紅明器一事功布以
白布三尺引柩柳車以衾覆棺誌石二片如品官之儀
塋地周圍十八步每面四步半祭物用豕力不足者隨
家有無既奏上曰婚喪之禮人道之重斟酌得宜行之
惟允其頒布天下使臣民皆遵守之

恩卹備考

聞訃

為大臣發喪禮

洪武二年十月庚午命禮部議天子為大臣發喪禮禮官請以宋太祖為韓王趙普舉哀故事其儀聞訃於西華門壬地設御幄南向陳御座於正中上置素褥侍儀司設訃者位於前設文武官陪哭位東西向奉慰位於訃者位北北向其日拱衛司備儀使奉迎車駕引禮導文武百官素服由西華門入就陪哭位引訃者亦由西

華門入立於西南侍儀奏外辦皇帝素服乘輿詣幄儀仗分列和聲署即陳樂設而不作太常卿於幄西跪奏某官來訃某年某月日臣某官以某疾薨請舉哀皇帝哭文武官皆哭太常卿跪奏止哭皇帝止哭文武官皆止哭文武官就奉慰位北向立班首詣御前跪百官皆跪奉慰畢俯伏興分立引禮導訃者就拜位四拜興訃者退太常卿奏禮畢皇帝還宮訃者及文武百官以次出明日舉哀如前儀

公侯喪輟朝

洪武二十三年命禮部定公侯卒葬輟朝禮著為令凡公侯卒於家者聞喪輟朝三日下葬輟朝一日卒於外者聞喪輟朝一日喪柩至京輟三日下葬仍輟一日輟朝之日不鳴鐘鼓各官服淺淡色衣烏紗帽黑角帶朝叅從之

為大臣發哀

洪武二年以開平忠武王常遇春訃至上悲悼即命禮

部議天子為大臣發哀禮禮官言周制王哭諸侯大宗伯為上相擅弓曰天子之哭諸侯也崔弁緇衣自周以降天子為諸王公妃主大臣宗戚外祖父母后父母內命婦及蕃國主之喪皆有舉哀之禮漢東海恭王薨明帝幸津門亭發哀晉長樂公主扶風王亮薨武帝並舉哀三日唐永安王孝基薨高祖為之發哀宋汝南郡王晉王夫人符氏薨天子為之素服舉哀此為諸王妃主而舉哀也魏司馬曹真薨帝幸城東張幃而哭之唐太

子右衛率李大亮卒太宗為之舉哀於別殿宋太師趙普薨太宗為之素服舉哀樂安郡主惟正薨仁宗素服發哀於後苑此為大臣宗戚而舉哀也今請以宋太宗為韓王趙普舉哀故事

其儀見職掌

為公侯訃輟朝

洪武二十二年命禮部定公侯卒葬輟朝禮著為令禮部議凡公侯卒於家者聞喪輟朝三日下葬輟朝一日卒於外者聞喪輟朝一日喪柩至京輟朝三日下葬輟

朝一日凡輟朝之日不鳴鐘鼓各官服淺淡色衣烏紗帽黑角帶朝叅從之

重考輟朝例

景泰三年禮部言昨者奉旨令稽輟朝事例今按諸司職掌公侯故輟朝三日都督至都指揮故輟朝二日公侯在外故輟朝二日靈樞到京仍輟朝三日其親王公主郡主薨逝輟朝俱係特旨又永樂間伊王薨輟朝十日具素服西角門視事永安公主薨輟朝四日亦素服

視事於西角門今後凡輟朝禮儀俱如永樂間例

祭葬

品官墳塋

洪武三年禮部尚書陶凱奏定品官墳塋之制一品塋地周圍九十步墳高一丈八尺二品塋地周圍八十步墳高一丈四尺三品塋地周圍七十步墳高一丈二尺以上石獸並六四品塋地周圍六十步五品五十步墳高八尺以上石獸並四六品四十步七品以下二十步

墳高六尺凡碑碣五品以上許用碑龜趺螭首六品以上用碣方趺圓首皆參酌古典以為定制

五品賜祭葬

宣德七年五月上聞少詹事兼侍讀學士王英母卒問尚書胡濙曰英母亦應得賜祭及營葬否濙對曰舊制官三品父母曾受封贈者官為營葬今英官四品其母受五品封上曰儒臣吾所優禮者況非此母無此子其遣官賜祭仍命有司治葬勿為例

不允袁忠徹祭葬

天順二年十月鴻臚寺丁憂序班袁應驤以其父尚寶寺少卿忠徹所纂相書來進且言忠徹祇事太宗皇帝靖難乞賜贈官葬祭上曰忠徹無他能第以區區相術受知太宗皇帝得累官職其為榮幸亦云至矣所請不允

允辭葬

成化八年八月致仕南京吏部尚書魏驥以是年正月

卒遣官祭葬其子鴻臚寺序班完以驥遺言具奏辭葬上曰大臣不幸云亡朝廷賜卹典以為盡忠者之勸非但為死者也今驥臨終遺言乃爾身之將死猶恐有勞於民可謂純臣矣覽之良久惻然重違其志特從之

申明祭葬限制

成化七年禮部尚書鄒幹等奏舊制公侯伯都督及在家文職一品二品父母妻并三品父母亡故者賜祭并造墳四品父母故者止賜祭然必其父母妻受本等封

贈者方許近來臣下雖例不該祭葬者往往陳乞蒙荷特恩不為過而中間有品級畧相等者輒援例希求不已不惟煩瀆宸聽又且事不歸一臣議自今除前項官父母并妻曾受本等封贈亡故照例請行若生前雖已受封不係本等品級如子見任三品官其父母受封四品亡故者止有祭又有子現任四品官其父母受五品六品七品者亡故祭葬皆無如此則庶幾卹典一定禮制無更從之

正典一祭例

成化八年應天府尹彭信卒其子乞祭葬禮部尚書鄒幹言在京三品例有祭葬而順天府尹王賢致仕卒惟有祭今信卒於任未敢定擬上命止與一祭命禮部左侍郎劉吉子申為國子監生許其請也

辨駁與祭葬議

正德八年禮科給事中王鑾等言大臣祭葬類多冒濫乞查例定擬禁革禮部議國家鑒古為制凡兩京四品

以上官皆給賜祭葬隆恩異數非但哀死於既往亦以
勸忠於將來也邇因逆瑾變亂事例不一人無適從乃
有自行陳乞覬干恩澤者屢經言官建白輒加裁損如
被劾去官職者特為停止未經考滿者減半給價侍從
邊功者臨時定奪雜流出身者不與覆奏在外者之祭
祀以年遠而不行四品官之父母雖受封而無葬斟酌時
宜可謂無復滲漏但今三品二品官被劾致仕者其祭
葬俱遵弘治十年恩例二品奏請量減三品還與祭葬

似等級畧舛乞以二品奏請量減者還與祭葬三品
被劾致仕者如二品例量減又三品父母受封有祭葬
而二品三品先後共歷四五年以未考滿請封例無祭
葬是二品父母有終不需祭葬之恩者矣四品父母受
封有祭而三品未及考滿或曾歷四品亦未考滿請封
是三品父母有終不需賜祭之恩者矣乞以二品三品
共歷三四年以上者雖未考滿父母准與祭葬三品未
及三年父母亦准與祭詔悉如所議自後不得紛更已

而鑾等又言三品被劾致仕舊止與祭今禮部擬與祭葬視以禮致仕者恩典混同無關勸戒宜舉正禮部奏辨此先帝恩旨但云還與則抑揚之意亦自有在請自今三品被劾致仕公論不與者止與祭一壇詔從之

嚴祭葬限制

嘉靖二十三年禮科都給事中周采等言國家優卹臣下祭葬贈諡載諸令甲今陳乞援附章奏紛紜請下禮部通查會典條格及前後事例著為畫一之法疏下禮

部議言祭葬之賜本以優寵臣下然計品論資以為
隆殺則辨勞之義存而怠者奮祭葬有兼得有半得
則辨賢之義存而不肖者懲難遂不得以干恩父母不
得以追附則辨能辨位之義存而覬覦者息規制甚備
但歲久因循為子孫者徒以傲惠君上為孝而不知分
限之不可越為有司者徒以推廣德意為務而不知恩
禮之不可濫臣等叅稽會典擬議條格如言侍臣者必
常日侍講讀言軍功者必常躬履行陣給半葬者必原

其年勞之異同請特恩者必論其途徑之邪正與例未
可拘法當報罷者條例上請惟聖裁明定一一二品官
妻受封病故者止祭一壇不得與夫之父母比一三品
四品父母止授五品以下封者不賜祭其稱特恩非日
講侍讀親履行陣及春宮親奉出閣開陳有勞者不得
概與一切雜途皆報罷一尚書左都御史已加三少而
奉旨革去者止與本等祭二壇加陞日淺政績未著者
臨時奏請定奪被劾閒住者不許一四品以上父母曾

授本等封者各許並祭無封贈者不許一二品文官妻未封夫人者不賜祭一被劾致仕者聽本部論其平生功過酌議可否請自上裁未考滿者不分在任致仕俱祭一壇葬減半聽調別用及閒住并閒住詔復者俱不許一四品官已考滿者父母雖不得重封著亦與祭一壇未考滿者不許疏上得旨被劾致仕者仍如弘治中例給與祭葬以稱朝廷優禮大臣之意餘皆如議

申明公侯伯祭葬差等

嘉靖三十二年十月故伏羌伯毛漢常被叅提未勘及卒
乞恩禮部議洪武間公侯祭葬之典甚隆蓋以待開國
功臣至永樂間始命承襲病故者與祭二壇而年幼襲
未久者與一壇所以貴其爵也若管府事有功加太子
太保以上者各有加祭則所以勸功也而為事者祭葬
俱無所以罰罪備載會典惟未詳所為事若以被劾閒
住為為事則都督例與祭六壇後閑住者亦與祭六壇
而侯伯乃祭葬俱無輕重似不倫又本以才能推用雖

經論劾其爵祿未常絕乃不惟革其管事所加祭遂并
本爵應得恩典盡削之反不與無才可推及年幼襲未
久者為比論法似太嚴若以犯罪叅提為為事則犯有
輕重勘有虛實恩典一槩削奪論罪似太混又為事者
之妻若并革其祭則罪非身造命未追奪不革其祭則
本從夫貴而妻獨蒙恩情理似未安自今公侯伯管府
事有功後被劾閒住者宜止削其管事有功所加祭仍
與本爵應得例葬及祭二壇若叅提罪重勘實果碍倫

理闕行檢者并本爵祭葬著一槩削之其罪狀頗輕勘問無實者當與閒住同論若未經勘實病故者減其半葬止與祭一壇其夫人命未追奪者似當不革其祭而祭文內亦應并及其夫以示恩從夫得庶幾祖宗貴爵之義與罪罰法並行不悖矣詔如議

謚例

奏慎重美謚

成化四年禮部主事陸淵之奏刑罰雖嚴可警於一時

爵賞雖重不及於後世惟美惡之謚一定則榮辱之名
永遠不朽我朝祖宗尤重謚法雖以親王勛臣苟無善
行亦不輕與之以美謚比年以來故官子孫往往以私
求而得美謚上之予之也既無所擇下之得之也不以
為榮適者太子少保禮部尚書兼文淵閣大學士陳文
卒奉聖旨謚曰莊靖莊靖美謚也陳文何足當此迹其
平生所存所行貪德彰聞污風大著縱子為惡滅裂義
方繆居調元贊化之任素乏經邦濟世之才生既逃於

重罰死又竊夫美名殊失古人勸善懲惡之典乞勅廷臣會議削其美名更以惡謚以服天下之心以為將來之戒設為大臣之惡不可暴之天下後世恐傷朝廷禮遇之意則止而不謚於義亦可奏入上曰陳文在時不聞人言其過惡歿後循例加以恩典事已施行如何方來許奏不准

特賜四品官謚

景泰七年巡按江西右僉都御史韓雍奏乞賜故國子

監祭酒李時勉贈謚下禮部議尚書胡濙等以為謚法之設有美有惡無非因人賢否而示勸懲也我朝於大官善者謚不善者不謚即古聖善善從長之意比者尚書周忱徐琦左都鎰等俱蒙賜謚如時勉官雖不過四品而其節概之高行誼之篤學問文章之純足以啟後學之敬慕誠非忱等可比宜如例請錫謚斯愜公論事下翰林院議於是少保大學士陳循等言時勉德行文章卓然為士林仰宗其臨事又多果斷而毅按謚法勤學

好問曰文果而能斷曰毅請謚曰文毅從之

允改謚

成化四年四月故國子監祭酒謚文毅李時勉孫顯奏請改謚加贈上曰時勉在先朝直言敢諫於忠無忝矣毅不足以盡之其謚文忠贈禮部左侍郎如曹鼎例

陳請謚

成化五年六月南京刑部尚書耿九疇子翰林院脩撰裕言先臣官行應得謚上賜謚清惠因諭禮部臣曰謚

法當時自有公論今後已往者不得陳請

覆與謚議

弘治十五年吏部尚書馬文昇奏三品以上大臣卒其子孫乞謚有賜有不賜者有謚及三品者美者多惡者少與者少不與者多乞斷自今凡二品以上大臣及始立功所封侯伯卒無問現任致仕應與謚者或三品有特賜者宜令吏兵二部備查勲業行實仍行禮科給事中詳議等第上請賜謚若所議未公許言官舉劾禮部

覆奏謂國朝臣下之謚皆出上賜乞仍遵舊制凡文武大臣謚俱本部具奏既得旨移文吏兵二部詳述勲業行實等第送翰林院定擬上請從之

卹例

初定封贈諸典

洪武五年禮部奏定封贈之禮凡文武官自一品至七品得贈其曾祖祖母及妻有差功臣歿後加贈則公封為王侯封為公歿於王事合加官爵封謚者有司奏

請若領兵征伐而陷沒者不許褒封或舊有勲勞合追封者有司不得輒請取自上裁凡功臣喪葬之禮有司臨時上請塋享堂碑亭官為脩治其壙內房室及享堂加采色惟公侯及一品得用其餘不許文官至二品武至三品或勅喪或賜錢帛公侯省府臺各指揮使等官之家父母及妻喪或遣官致祭及賜予皆出自上恩武臣歿於王事者自迎柩至墓凡七次遣官致祭小祥大祥皆有司隨時上請給賜之恩取自上裁指揮千

百戶亡歿有優給之例從征死事者全給從征病卒者半之邊上守禦病故及從征病還而卒者不得援例優給其有勤勞立功者優給之恩亦取自上裁有司不得奏請詔從之

內臣乞封諡

成化八年寧普伯劉聚奏乞封諡故叔御馬監太監劉永誠并乞祠堂賜額事下禮部言無封諡內臣事例惟故司禮監太監王振祠堂蒙英宗賜額旌忠今永誠所

乞未敢擅擬有旨賜祠額曰褒功仍命內閣議擬封謚
大學士彭時等言王振輔翼英宗年久又死國事英宗
復位非不欲重加褒恤因無舊例止賜祠額今劉永誠
得照例賜額已為過矣若又加封謚出於王振之上則
輕重不倫人心不服將來守邊等項如永誠者將紛然
比例陳乞變祖宗之法必自此始況今多事之際正宜
恪守成憲以慰人心不可輕易更改致生外議於是事
寢不行

裁武臣卹請

弘治十五年禮部議得公侯都督等官病故既有祭葬之賜其家又以齊糧麻布為請在開國元勳則可在廢襲者則不可請今後齊糧麻布悉與革免

裁省文武卹典

嘉靖二十八年給事中任有齡言大臣卹典為費不貲今請乞太多不無濫與宜令所司詳按禮部亦以為然因請自今定議凡大臣卹典或例雖應得而行業無聞

勲勞未著者以次遞降其罪過昭彰者皆不准給庶
於卹死之中寓勸生之道又諸皇親指揮以下或妃嬪
父母或其兄弟祭葬槨給似無等差亦宜分別裁定以
重恩典節裁用上曰文武官卹典如議皇親自宜從厚
且生不與爵祿所省為多死後又議殺之不可其仍舊
行

酌處遇害卹錄

嘉靖十一年福建布政查約叅議楊禹都指揮王翔以

賊囚林汝美等反獄遇害都御史王應鵬御史蘇信稱其忠義宜加褒錄給事中薛宗鎧言約等非為國死事特以變起倉卒不及趨避與蹈水火何異難比孫燧諸臣事例上是其言下禮部議覆諸臣向蒙賜葬是誨具遇害不得更議加卹

體訪等第以給卹典

隆慶二年禮科給事中張鹵言先朝建言得罪及應得卹典諸臣事久時移搜覆未遍宜趣撫按及提學官采

訪奏聞其諸陳乞者一切報罪於是禮部覆言諸臣中固有進退光明始終一致者亦有因人成事見斥及退居之後肆情妄作晚節不終其為人品難以槩論設稍不為區別則朝廷勵世之典遂為臣下市恩之私其何以勸天下後世請中所司從公體訪分別等第行誼卓越心術純正見重鄉評者為上謹守廉隅人無疵議者次之罔利營私敗名喪節者為下各指陳實跡毋徇情私如有濫舉者參奏如法上是之

更定卹典條例

隆慶三年禮科都給事中王之垣請定議文武官卹典如宗藩條例體式頒示中外以省瀆擾禮部請如之垣言叅酌前後故事列為條例以俟聖裁至是禮部議上一丈武官祭葬有無隆殺之等悉遵會典其特恩如侍從必日侍講讀軍功必躬履行陣春宮官必親奉出閣開陳有勞者悉遵嘉靖中題允事例其祭葬大約於本等品級內量加一等無祭者給與全葬如講讀官五品

本身有祭四品本身父母得擬祭葬三品得及其妻軍功則四品本身得擬祭葬三品未滿得及其父母加恩成例各有等差不得超越資次妄生希覬其或有讀講年久軍旅功多恩卹特宜從厚者禮部臨時議請其餘不許一概援引陳乞

一一品官父母妻加祭有父母加二壇者有妻加一壇者妻止於一壇者遇有陳乞禮部酌議以聞不得預擬一會典所定二品祭數本身二壇如有三少或兼大學

士贈一品者至四壇父母與妻俱一壇節年所議則例如致仕加三少者加祭一壇加太子太保者加祭三壇原加三少而續奉旨革去者止與本等祭二壇其被劾閒住者祭俱無妻未封夫人者不准與祭加陞日淺政績未著者禮部臨時核實奏請量減

一三品官祭墓不分在任致仕俱祭一壇兼學士贈尚書者祭二壇未及考滿病故者祭一壇減半造墳造墓悉如舊例

欽定四庫全書

禮部志稿
卷八十七

一四品官凡經考滿者父母雖止授五品封亦與祭一壇其未經考滿者不得越例陳乞一品官父母未蒙封贈者於制本不當霑祭不許越例冒請若品官妻非係封贈夫人者原與祭典不准並祭二品三品共歷三年以上者雖未考三品滿本身父母俱准與三品祭葬三品四品共歷三年以上者雖未考四品滿本身准照三品未考滿例祭一壇半葬父母准祭一壇其未及三年以上者不得妄行陳請

一內外官不拘品級凡已授外封及後授京職考滿宜封而例不得重封者悉照品級給與應得祭葬如不因考滿而蒙恩詔受封者非係講讀軍功仍不准給

一二品以上者雖經論劾中間或有心行無疵優禮致仕者悉照弘治年間例給與身後恩典如有罪過昭彰公論共棄者不拘見任等項俱不得概給其被劾開任遇蒙覃恩開復致仕者祭葬仍不准給不許混奏

一被劾聽調功過未明舉措未定者使人品原無可議

所有應得祭葬准與全給或功有可錄過有可原者以全給擬作半給半給作有祭無葬至於罪過昭彰公論共棄者照間住事例不准給

一因事革職而後賜復原職給以應得恩典如嘉靖二十七年例其覃恩槩復者不得援以為例今後自三品以上凡遇此項悉照所復品級題給祭葬若後復職銜反優於原職者仍照原職施行其被核聽核未明身故者照間住例俱不准給

一勲臣祭葬除皇親外其為事革祭者如正德嘉靖間
題給賜祭則例今後公侯伯在內掌府事坐營在外總
兵征討積有勲勞而加太子太保以上者照會典公侯
祭十六壇伯祭十五壇掌府事坐營總兵歷有勲勞者
與祭五壇雖掌府事坐營而政績未著者與祭四壇管
事被劾勘明閒住者祭二壇被劾未經勘實者祭一壇
勘實者祭一壇勘實而罪重者并本爵應得祭葬一概
盡削又正德間公侯伯本祭俱三壇嘉靖間仍祭二壇

今後照嘉靖間事例以復會典之舊

一武臣祭葬舊例都督同知僉事起用未久病故者與祭二壇錦衣衛都指揮使身後贈都督同知者亦祭三壇署都督同知照署都督僉事止與祭一壇今後推類一體遵行

一死事官如抗節不屈身死綱常者犯顏諫諍身死國事者執銳先登身死戰陣者危城固守身死封疆者仍照例立祠此外或有城池失守而身殞於奔命戰陣敗衄

而軀斃於倒戈者止為酌量輕重賜之葬祭或加贈廕
不得一概立祠

禮部志稿卷八十七